



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԷԿՈՆՈՄԻԿԱՅԻ ՆԱԽԱՐԱՐ
Հ Ր Ա Մ Ա Ն

ք. Երևան

« 06 » 03 2020թ N° 347-Ձ

«ՓՄՁ-ի սոփիստիկացման և զարգացման ծրագրերի ՀԱՄԱԿԱՐԳՈՒՄ ԵՎ
ԿԱՌԱՎԱՐՈՒՄ» 2020 ԹՎԱԿԱՆԻ ԾՐԱԳԻՐԸ ԵՎ ԾՐԱԳՐԻ ԻՐԱԿԱՆԱՑՄԱՆ
ՄԻՋՈՑԱՌՈՒՄՆԵՐԻ ԺԱՄԱՆԱԿԱՑՈՒՅՑԸ ՀԱՍՏԱՏԵԼՈՒ ՄԱՍԻՆ

Հիմք ընդունելով Հայաստանի Հանրապետության կառավարության 2019 թվականի
դեկտեմբերի 26-ի N 1919 որոշման 11-րդ կետի 1-ին ենթակետի «բ» պարբերությունը

Հ Ր Ա Մ Ա Յ ՈՒ Մ ԵՄ՝

1. Հաստատել.

1) «ՓՄՁ-ի սուբյեկտներին աջակցության ծրագրերի համակարգում և կառավարում»
2020 թվականի ծրագիրը՝ համաձայն N 1 հավելվածի.

2) «ՓՄՁ-ի սուբյեկտներին աջակցության ծրագրերի համակարգում և կառավարում»
2020 թվականի ծրագրի իրականացման միջոցառումների ժամանակացույցը՝ համաձայն N 2
հավելվածի.

2. Հայաստանի Հանրապետության էկոնոմիկայի նախարարության (այսուհետ՝
Նախարարություն) տեղեկատվության և հասարակայնության հետ կապերի վարչության
պետի տեղակալ Անահիտ Խեչոյանին՝ ապահովել սույն հրամանի տեղադրումը
Նախարարության պաշտոնական կայքէջում.

3. Նախարարության գլխավոր քարտուղարի պաշտոնակատար Արմինե
Խառատյանին՝ սույն հրամանը հաստատվելուց հետո 10-օրյա ժամկետում Հայաստանի

Հանրապետության կառավարության 2003 թվականի դեկտեմբերի 24-ի N 1937-Ն որոշմամբ սահմանված կարգով ապահովել 2020 թվականի ծրագրով 2020 թվականին նախատեսված միջոցառումների իրականացման նպատակով կազմակերպության ընտրության մրցութային հանձնաժողովի ստեղծումը:



ՏԻԳՐԱՆ ԽԱՉԱՏՐՅԱՆ

2020 ԹՎԱԿԱՆԻ ԾՐԱԳԻՐ
**«ՓՄՁ-Ի ՍՈՒԲՅԵԿՏՆԵՐԻՆ ԱԶԱԿՑՈՒԹՅԱՆ ԾՐԱԳՐԵՐԻ ՀԱՄԱԿԱՐԳՈՒՄ ԵՎ
ԿԱՌԱՎԱՐՈՒՄ»**

ԳԼՈՒԽ 1. ՆԱԽԱԲԱՆ

1. Հայաստանի Հանրապետությունում կայուն տնտեսական աճի ապահովման քաղաքականության համատեքստում փոքր և միջին ձեռնարկատիրության (այսուհետ՝ ՓՄՁ) զարգացումն է կոչված ապահովելու երկրի տնտեսական աճի կայունությունը՝ տնտեսությանը հաղորդելով նորարարական ուղղվածություն և ճկունություն:

2. ՓՄՁ-ի սուբյեկտներին ուղղված աջակցության ծրագրերը հիմնված են Հայաստանի Հանրապետության կառավարության որդեգրած տնտեսական քաղաքականության հիմնարար սկզբունքների վրա և նպաստում են երկրի, հատկապես նրա հեռավոր ու սահմանամերձ բնակավայրերի տնտեսական զարգացմանը և անհամամասնությունների հաղթահարմանը, ինչը ներկայումս Հայաստանի Հանրապետության կառավարության տնտեսական քաղաքականության ռազմավարական ու գերակա ուղղություններից մեկն է: Այս առումով ՓՄՁ-ն իր առանձնահատկություններով ու զարգացմամբ ընձեռած հնարավորություններով այն անկյունաքարն է, որը նշանակալի ազդեցություն ունի երկրի տնտեսական զարգացման վրա՝ ապահովելով զգալի սոցիալ-տնտեսական արդյունք և տարածքային համաչափ զարգացում:

3. Կարևորելով ՓՄՁ-ի դերը երկրի տնտեսության զարգացման, նոր աշխատատեղերի ստեղծման, բնակչության կենսամակարդակի բարձրացման, հասարակության միջին խավի ձևավորման և դրանով իսկ աղքատության հաղթահարման, ինչպես նաև երկրում սոցիալական համերաշխության ու քաղաքական կայունության ապահովման գործում՝ Հայաստանի Հանրապետության կառավարությունը շարունակական քայլեր է ձեռնարկում՝ ուղղված ՓՄՁ-ին պետական աջակցության և դրա զարգացման ուղղությամբ համապատասխան ծրագրերի (միջոցառումների) իրականացմանը, ինչպես նաև ՓՄՁ-ի զարգացման խոչընդոտների բացահայտմանն ու վերացմանը՝ շարունակաբար ներդնելով ՓՄՁ-ի սուբյեկտներին աջակցության առավել արդյունավետ մեխանիզմներ (գործիքներ):

4. Ինչպես նախորդ տարիներին, այնպես էլ 2019 թվականին հետևողական աշխատանք է իրականացվել Հայաստանի Հանրապետությունում ՓՄՁ-ի զարգացման քաղաքականության ու ռազմավարության, ՓՄՁ-ի զարգացման ծրագրերի մշակման, ինչպես նաև ՓՄՁ-ին պետական աջակցությամբ համապատասխան ծրագրերի (միջոցառումների) իրականացման ուղղությամբ:

5. «Աջակցություն ՓՄՁ սուբյեկտներին» 2019 թվականի ծրագրի իրականացնման նպատակով 2019 թվականի առաջին եռամսյակի ընթացքում ՀՀ պետական բյուջեից ուղղվել է 30,581,000 ՀՀ դրամ, իսկ Հայաստանի ՓՄՁ ԶԱԿ հիմնադրամի և ՀՀ էկոնոմիկայի նախարարության միջև 05.09.2019թ կնքված N 114-19 պայմանագրի շրջանակներում «Ներդրումների աջակցման կենտրոն» հիմնադրամի (Հայաստանի ՓՄՁ ԶԱԿ հիմնադրամի իրավահաջորդ) կողմից 2019 թվականի սեպտեմբեր-դեկտեմբեր ամիսների ընթացքում իրականացված աշխատանքների համար ՀՀ պետական բյուջեից հատկացվել է 91,749,751 ՀՀ դրամ: Այսպիսով՝ 2019 թվականին հատկացվել է 122,3 մլն. դրամ, որի հաշվին ֆինանսական, ուսուցողական և տեխնիկական 5206 աջակցություն է ցուցաբերվել շուրջ 2200 սկսնակ և գործող ՓՄՁ սուբյեկտի:

6. Ընդ որում՝ աջակցություն ստացած ՓՄՁ-ի սուբյեկտների 3.3%-ը գործում են Երևան քաղաքում, իսկ 96.7%-ը՝ Հայաստանի Հանրապետության մարզերում, առավելապես հեռավոր և սահմանամերձ գյուղական և քաղաքային համայնքներում:

7.«Ներդրումների աջակցման կենտրոն» հիմնադրամի կողմից 2019 թվականի ընթացքում տրամադրված աջակցության մարզային բաշխվածքը հետևյալն է. Արագածոտնի մարզում՝ 488, Արարատի մարզում՝ 358, Արմավիրի մարզում՝ 263, Գեղարքունիքի մարզում՝ 297, Լոռու մարզում՝ 767, Կոտայքի մարզում՝ 934, Շիրակի մարզում՝ 419, Սյունիքի մարզում՝ 311, Վայոց Ձորի մարզում՝ 492, Տավուշի մարզում՝ 608, Երևան քաղաքում՝ 269:

ԳԼՈՒԽ 2. ԾՐԱԳՐԻ ՄՇԱԿՄԱՆ ՀԻՄՔԵՐԸ

8. «ՓՄՁ-ի սուբյեկտներին աջակցության ծրագրերի համակարգում և կառավարում» 2020 թվականի ծրագրի (այսուհետ՝ ծրագիր) մշակման և իրականացնելու հիմքերն են «Փոքր և միջին ձեռնարկատիրության պետական աջակցության մասին» Հայաստանի Հանրապետության օրենքը (4-րդ հոդվածի պահանջ) և Հայաստանի Հանրապետության կառավարության 2019 թվականի դեկտեմբերի 26-ի N 1919 որոշումը (11-րդ կետի 1-ին ենթակետի «բ» պարբերությունը):

ԳԼՈՒԽ 3. ԾՐԱԳՐԻ ՆՊԱՏԱԿՆԵՐԸ

9. Ծրագրի նպատակներն են՝

- 1) պետական ուղղակի աջակցության մեխանիզմների (գործիքների) միջոցով երկրում ՓՄՁ-ի զարգացման խթանումը.
- 2) ՓՄՁ-ի զարգացման միջոցով երկրի, հատկապես նրա հեռավոր ու սահմանամերձ բնակավայրերի տնտեսական զարգացմանը և անհամամասնությունների հաղթահարմանը նպաստելը.
- 3) ՓՄՁ-ի զարգացման միջոցով երկրի տնտեսության բազմազանեցմանը նպաստելը և զբաղվածության ու ինքնազբաղվածության մակարդակի բարձրացման ապահովումը.
- 4) ՓՄՁ-ի սուբյեկտներին պետական աջակցությանը նպատակաուղղված շրջանակների բազմազանեցումը, ինչպես նաև ՓՄՁ-ի սուբյեկտներին

ցուցաբերվելիք պետական աջակցության նպատակայնության ու հասցեականության ապահովումը:

10. Ծրագրի նպատակների իրագործման ապահովման համար նախատեսվում են՝
 - 1) գործարար միջավայրի բարելավմանը զուգընթաց գործող և սկսնակ ՓՄՁ-ի սուբյեկտների ձեռներեցությամբ զբաղվելու, ինչպես նաև նրանց ֆինանսական և ներդրումային հնարավորությունների ընդլայնում՝ նախապատվությունը տալով Հայաստանի Հանրապետության մարզերին՝ հաշվի առնելով Հայաստանի Հանրապետության տարածքային զարգացման առանձնահատկությունները.
 - 2) ՓՄՁ-ի սուբյեկտներին պետական աջակցության առկա մեխանիզմների/գործիքների (ֆինանսական, տեղեկատվական, խորհրդատվական, ուսուցողական և այլն) կիրառման շարունակականության և արդիականացման ապահովում.
 - 3) ՓՄՁ-ի սուբյեկտների գործունեության միջազգայնացում, մասնավորապես, հեռանկարային և արտահանման ներուժ ունեցող ՓՄՁ սուբյեկտներին աջակցություն՝ գործող միջազգային կառույցներին և ցանցերին ինտեգրում.
 - 4) ՓՄՁ-ի սուբյեկտների կողմից ռեսուրսախնայողական և մաքուր արտադրության սկզբունքների կիրառման խրախուսում.
 - 5) ծրագրի իրականացման շրջանակներում ավելի շատ ՓՄՁ-ի սուբյեկտների ներգրավում և նրանց ցուցաբերվող պետական աջակցության շրջանակների ընդլայնում.
 - 6) ՓՄՁ-ի սուբյեկտներին աջակցող ենթակառուցվածքների հզորացման միջոցառումների իրականացում:

ԳԼՈՒԽ 4. ԾՐԱԳՐԻ ԻՐԱԿԱՆԱՑՄԱՆ ՍԿԶԲՈՒՆՔՆԵՐԸ

11. Ծրագրի իրականացման սկզբունքներն են՝
 - 1) ծրագիրն իրականացվում է ծրագրով նախատեսված ՓՄՁ-ի սուբյեկտներին աջակցող կառույցների միջոցով.
 - 2) ծրագրի իրականացման շրջանակներում նախապատվությունը տրվում է արտադրության և ծառայությունների ոլորտում գործող, նորարարություններ ներդնող, ժամանակակից ու մաքուր տեխնոլոգիաներ կիրառող, հեռանկարային և արտահանման ներուժ ունեցող՝ գործող և սկսնակ ՓՄՁ-ի սուբյեկտներին աջակցությանը.
 - 3) ծրագրի իրականացմանը առավել մեծ թվով գործող և սկսնակ ՓՄՁ-ի սուբյեկտներին ներգրավելու միջոցով նպաստել Հայաստանի Հանրապետության տարածքային զարգացման անհամաչափությունների հարթեցմանը և համահավասար զարգացմանը
 - 4) միջազգային և օտարերկրյա դոնոր կազմակերպությունների հետ փոխհամաձայնությունների շրջանակներում մշակվում և իրականացվում են ՓՄՁ-ի զարգացման համատեղ (համաֆինանսավորման սկզբունքով) ծրագրեր՝ Հայաստանի Հանրապետության օրենսդրությամբ սահմանված կարգով:

ԳԼՈՒԽ 5. ԾՐԱԳՐԱՅԻՆ ՄԻՋՈՑԱՌՈՒՄՆԵՐԸ (ՈՒՂՂՈՒԹՅՈՒՆՆԵՐԸ)

12. Ծրագրով նախատեսված ծրագրային միջոցառումներն (ուղղություններն) են՝

1. ՓՄՁ-ի սուբյեկտներին գործարար ուսուցողական աջակցություն (կարողությունների զարգացում)

13. ՓՄՁ-ի սուբյեկտներին գործարար ուսուցողական աջակցության շրջանակներում կիրականացվեն «Սկսնակ գործարարների ձեռներեցությանն աջակցություն» ծրագրեր, որոնք ընդգրկում են հետևյալ բաղադրիչները՝ մասնակիցների ուսուցում, վերապատրաստում, մասնագիտական խորհրդատվության և տեղեկատվության տրամադրում, մանրակրկիտ ընտրության փուլ անցած գաղափարների կյանքի կոչման նպատակով գործարար ծրագրերի մշակում: Այդ ամենի արդյունքում սկսնակ գործարարները ձեռք կբերեն իրենց բիզնեսի, անձնակազմի և ֆինանսական միջոցների կառավարման, պլանավորման, շուկայավարման գիտելիքներ և համապատասխան գործարար հմտություններ:

14. 2020 թվականին նախատեսվում է իրականացնել «Սկսնակ գործարարների ձեռներեցությանն աջակցություն» ծրագրեր Հայաստանի Հանրապետության մարզերում և քաղաք Երևանում:

15. Բացի դրանից՝ ուսուցողական աջակցության շրջանակներում, ըստ կարիքի, կիրականացվեն նաև այլ գործարար ուսուցողական դասընթացներ՝ գործող և սկսնակ ՓՄՁ-ի սուբյեկտներին համար, որոնք կկազմակերպվեն միջազգային և օտարերկրյա կազմակերպությունների (ծրագրերի) հետ համագործակցության շրջանակներում: Դրա հետ մեկտեղ Հայաստանի Հանրապետության մարզերում կիրականացվեն նաև ոլորտային (տեխնոլոգիական) դասընթացներ, որոնց իրականացման վայրը և բնույթը նույնպես կորոշվեն կարիքների գնահատման հիման վրա՝ ըստ առկա պահանջարկի:

16. Ընդհանուր առմամբ, 2020 թվականին գործարար ուսուցողական աջակցության ծրագրերի շրջանակներում Հայաստանի Հանրապետության բոլոր մարզերում և Երևան քաղաքում գործարար ուսուցողական դասընթացներին կմասնակցեն 500 սկսնակ և գործող ՓՄՁ-ի սուբյեկտներ:

2. ՓՄՁ-ի սուբյեկտներին գործարար տեղեկատվական, խորհրդատվական և տեխնիկական աջակցություն

17. ՓՄՁ-ի սուբյեկտներին գործարար տեղեկատվական, խորհրդատվական և տեխնիկական աջակցություն կցուցաբերվի հետևյալ ուղղություններով՝

18. ՓՄՁ-ի սուբյեկտների առավել լայն շրջանակների համար գործարար տեղեկատվության և խորհրդատվության հասանելիության և մատչելիության ապահովման նպատակով Հայաստանի Հանրապետության բոլոր մարզերում խմբային և անհատական

հանդիպումներ կկազմակերպվեն ՓՄՁ-ի սուբյեկտների ներկայացուցիչների (գործարարների) հետ: Հանդիպումների ընթացքում գործարարներին կներկայացվեն Հայաստանի Հանրապետության օրենսդրական դաշտում տեղի ունեցած ու նախատեսվող փոփոխությունները և կտրվեն պարզաբանումներ: Ըստ անհրաժեշտության, հանդիպումներին մասնակից կդառնան նաև պետական և տեղական ինքնակառավարման մարմինների ներկայացուցիչներ: Որոշակի հարցերի քննարկման նպատակով հանդիպումներ կկազմակերպվեն նաև հատուկ թիրախավորված խմբերի հետ:

19. Տվյալ բաղադրիչի շրջանակներում սկսնակ և գործող ՓՄՁ-ի սուբյեկտներին կտրամադրվեն նաև անհատական խորհրդատվություններ ձեռնարկատիրական գործունեությանն առնչվող օրենսդրական բոլոր ուղղություններով, այդ թվում՝ հարկային, մաքսային, սննդի անվտանգության, տեխնիկական կանոնակարգման, հավաստագրման և սերտիֆիկացման, մտավոր սեփականության պաշտպանության, տեսչական բարեփոխումների և հսկողության, ինչպես նաև Եվրասիական տնտեսական միության, Եվրոպական միության իրավական կարգավորումների վերաբերյալ և այլն:

20. Կիրականացվեն ՓՄՁ-ի ոլորտում պետական քաղաքականության և պետական աջակցության վերաբերյալ հանրության իրազեկվածությանն ուղղված լայնածավալ միջոցառումներ՝ օգտագործելով հանրային իրազեկման բոլոր հնարավորությունները:

21. Կբարձրացվի պետական գնումների և դրանց ընթացակարգերի վերաբերյալ տեղեկատվության մատչելիությունը ՓՄՁ-ի համար, կտրամադրվի տեխնիկական աջակցություն պետական գնումներին մասնակցող ՓՄՁ-ների հայտերի կազմման ընթացքում:

22. 2020 թվականի ընթացքում կշարունակվի գիտելիքային հարթակի կատարելագործումը, որտեղ ներկայացված են ՓՄՁ-ներին անհրաժեշտ ամբողջ տեղեկատվությունը, ստեղծման, աճի և ընդլայնման փուլերում, ներառված են ուղեցույցներ, հաջողված բիզնես մոդելներ, նաև առկա է սեփական բիզնես ծրագրի նախագծման առցանց գործիք և հաճախորդի 24/7 սպասարկման օնլայն հարթակ:

23. Կստեղծվի և կշահագործի հարթակ, որտեղ ներկայացված կլինեն ՓՄՁ ֆինանսավորման բոլոր հանրային, ինչպես նաև այլ (դոնոր, ՀԿ) գործիքները և մեխանիզմները:

24. Կիրականացվեն ձեռնարկատիրական մշակույթի զարգացման և նորարարական շեշտադրումներով ձեռներեցության խրախուսման միջոցառումներ:

25. Ընդհանուր առմամբ, 2020 թվականի ընթացքում գործարար տեղեկատվական, խորհրդատվական և տեխնիկական աջակցության շրջանակներում սկսնակ և գործող ՓՄՁ սուբյեկտի կտրամադրվի 7000 - 8000 բանավոր խորհրդատվություն:

3. ՓՄՁ-ի սուբյեկտներին ֆինանսական և ներդրումային աջակցություն

26. ՓՄՁ-ի սուբյեկտների գործունեության զարգացման համար կարևոր խնդիր է ֆինանսական (վարկային) ռեսուրսների հասանելիությունը: Այդ նպատակով ծրագրի

շրջանակներում 2020 թվականին կշարունակվեն ֆինանսական և ներդրումային աջակցության մեխանիզմների (գործիքների) կիրառումը:

27. Ծրագրային այս միջոցառումը (ուղղությունը) ներառում է հետևյալ ֆինանսական մեխանիզմները (գործիքները)՝

- 1) Վարկերի դիմաց երաշխավորությունների տրամադրում.
- 2) Սկսնակ գործարարներին ֆինանսական աջակցություն (վարկային երաշխավորությունների տրամադրում).
- 3) Գործարար նախաձեռնություններին աջակցություն.
- 4) Առևտրային բանկերի հետ գործող ֆինանսական աջակցության գործիքակազմի պայմանների բարելավման և ընդլայնման մեխանիզմների, ինչպես նաև նոր գործիքների ներդրման աշխատանքների իրականացում:

28. Ընդհանուր առմամբ՝ 2020 թվականին ֆինանսական աջակցություն կցուցաբերվի 200 գործող և սկսնակ ՓՄՁ-ի սուբյեկտի:

4. Տեղական տնտեսական զարգացում և ոլորտային աջակցություն

29. «Տեղական տնտեսական զարգացում» ծրագրային միջոցառման (ուղղության) նպատակն է Հայաստանի Հանրապետության համայնքների համաչափ զարգացման խնդիրների լուծման նպատակով մասնակցային պլանավորման և արդյունքների մասնակցային գնահատման մեթոդների վրա հիմնված տարածաշրջանային և համայնքային տնտեսական զարգացման ծրագրերի իրականացումը, ինչպես նաև տեղական հումքի, աշխատուժի, ավանդույթների և գիտելիքի վրա հիմնված մրցունակ արտադրության խթանումը, տեղական ապրանքանիշերի ձևավորումը և հետագա առաջնորդումը՝ նորարարական մոտեցումների կիրառմամբ: Միաժամանակ, տեղական տնտեսական զարգացումը միտված է բացահայտելու Հայաստանի Հանրապետության համայնքների տնտեսական ներուժը և դրա հիման վրա ձեռնարկելու տնտեսության զարգացման նախաձեռնություններ, որոնք կբարձրացնեն Հայաստանի Հանրապետության համայնքների մրցունակությունը և Հայաստանի Հանրապետության տնտեսության ճյուղերի արդյունավետությունը: ՓՄՁ-ի սուբյեկտներին աջակցող կազմակերպությունն իր գործունեությունն իրականացնելիս ըստ հնարավորության հաշվի կառնի ՀՀ տարածքային զարգացման 2016-2025 թվականների ռազմավարությամբ նախատեսված ընդհանուր գործառնական ծրագրերի առաջնահերթությունները և նախատեսված միջոցառումները, ինչպես նաև յուրաքանչյուր մարզի համար մշակված 2017-2025 թվականների զարգացման ռազմավարությունները:

30. Տեղական արտադրանքի խթանում և տեղական ապրանքանիշերի առաջնորդում՝ աջակցություն կցուցաբերվի տեղական ռեսուրսների վրա հիմնված ապրանքների և ծառայությունների զարգացմանը:

31. Ոլորտային բիզնեսներին աջակցության նպատակն է տեղական հումքի, աշխատուժի, ավանդույթների և գիտելիքի վրա հիմնված տնտեսության՝ հատկապես արտահանման ներուժ ունեցող մրցունակ ոլորտների զարգացումը և ներմուծմանը փոխարինող տեղական

արտադրությունների ձևավորման խթանումը՝ օրինակելի գործարար մոդելների ներդրման միջոցով: Ոլորտային բիզնեսներին աջակցության շրջանակներում կիրականացվեն օրինակելի գործարար մոդելների ստեղծում և ներդրում, տեխնոլոգիական ձեռնարկ-ուղեցույցի հրատարակում, տեխնոլոգիական դրամաշնորհի տրամադրում, ուղեկցում, մոնիթորինգ և գնահատում: Մասնավորապես, կշարունակվի աջակցություն ցուցաբերվել ջերմոցային և սառնարանային տնտեսություններին, չրագործությամբ, հյուրատնային գործունեությամբ, պանրի, պահածոների և տեղական հումքով մսամթերքի արտադրությամբ զբաղվող բիզնեսներին, ինչպես նաև կմեկնարկեն այլ մրցունակ ենթաճյուղերի աջակցության աշխատանքները:

5. Տեղական արտադրանքի արտահանմանն աջակցություն և ՓՄՁ-ի սուբյեկտների միջազգային համագործակցության ընդլայնման ապահովում

32. Հայաստանում ձեռնարկատիրության զարգացման կարևոր խնդիրներից է ՓՄՁ-ի սուբյեկտների գործունեության միջազգայնացումը, որը լրացուցիչ հնարավորություններ կստեղծի տեղական ՓՄՁ-ի սուբյեկտների համար՝ արտաքին շուկաներ մուտք գործելու գործընթացում:

33. Համագործակցելով տեղական և միջազգային կազմակերպությունների հետ՝ կտեղայնացվի տվյալ ուղղությամբ գոյություն ունեցող լավագույն միջազգային փորձը: Արդյունավետ գործիքներ կկիրառվեն արտահանող կամ արտահանման ներուժ ունեցող ՓՄՁ սուբյեկտներին համակողմանի տեխնիկական, տեղեկատվական և խորհրդատվական աջակցություն ցուցաբերելու նպատակով: Տվյալ բաղադրիչի շրջանակներում հատկապես կարևորվում են արտադրության ստանդարտացումը միջազգային նորմերի համապատասխան, փաթեթավարումը, արտահանման հետ կապված կարգավորումների իրազեկումը, անհատական կամ խմբային ապրանքանշման կիրառումը, կլաստերիզացիան և այլն:

34. Կբարձրացվի ՓՄՁ-ների համար արտահանման և ներմուծման ընթացակարգերի վերաբերյալ տեղեկատվության հասանելիությունը և մատչելիությունը, կիրականացվի արտաքին շուկաներում առկա հնարավորությունների և ռիսկերի վերաբերյալ ՓՄՁ շրջանում տեղեկատվության տարածման աշխատանքներ, ինչպես նաև Ֆինանսական աջակցություն կտրամադրվի ՓՄՁ աջակցություն իրականացնող կառույցների կողմից ներգնա և արտագնա առևտրային առաքելությունների իրականացմանը, ցուցահանդեսների կազմակերպման և մասնակցության ապահովմանը:

6. Միջազգային և օտարերկրյա դոնոր կազմակերպությունների հետ ՓՄՁ-ի զարգացման համատեղ (համաֆինանսավորման սկզբունքով) ծրագրերի մշակում և իրականացում

35. Ծրագրով նախատեսված ծրագրային միջոցառումների (ուղղությունների) իրականացման արդյունավետության բարձրացման ու ընդլայնման և այդ համատեքստում

լրացուցիչ ֆինանսական ռեսուրսների ներգրավման նպատակով, ինչպես ընթացքի մեջ գտնվող ծրագրերի շրջանակներում, այնպես էլ նոր ծրագրերի մշակման ու իրականացման, նաև միջազգային լավագույն փորձի փոխանցման նպատակով, աշխատանքներ կիրականացվեն Հայաստանում ՓՄՁ-ի զարգացմանն ուղղված համապատասխան ծրագրեր իրականացնող միջազգային և օտարերկրյա կազմակերպությունների (ծրագրերի) հետ համագործակցության ընդլայնման, ինչպես նաև նոր ծրագրային առաջարկների մշակման ու իրականացման ուղղությամբ:

36. Ամփոփում. Ընդհանուր առմամբ, 2020 թվականի ընթացքում ֆինանսական ու ներդրումային աջակցության, տեղական տնտեսական զարգացման և ոլորտային աջակցության, տեղական արտադրանքի արտահանմանն աջակցության և ՓՄՁ-ի սուբյեկտների միջազգային համագործակցության ընդլայնման ապահովման, կանանց ձեռներեցությանն աջակցության, «Սկսնակ գործարարների ձեռներեցությանն աջակցության», ինչպես նաև գործարար ուսուցողական, տեղեկատվական և խորհրդատվական ուղղություններով աջակցություն կցուցաբերվի Երևանում և Հայաստանի Հանրապետության մարզերում գործող սկսնակ և գործող ՓՄՁ-ի սուբյեկտների, մասնավորապես՝

1) գործարար ուսուցողական աջակցության շրջանակներում աջակցություն կցուցաբերվի 500 սկսնակ և գործող ՓՄՁ-ի սուբյեկտների.

2) տեղեկատվական, խորհրդատվական և տեխնիկական աջակցության շրջանակներում սկսնակ և գործող ՓՄՁ սուբյեկտի կտրամադրվի 7000 - 8000 բանավոր խորհրդատվություն.

3) ֆինանսական և ներդրումային աջակցության շրջանակներում աջակցություն կցուցաբերվի 200 սկսնակ և գործող ՓՄՁ-ի սուբյեկտների:

ԳԼՈՒԽ 6. ԾՐԱԳՐԻ ՖԻՆԱՆՍԱԿԱՆ ԱՊԱՀՈՎՈՒՄԸ

37. Համաձայն «Փոքր և միջին ձեռնարկատիրության պետական աջակցության մասին» Հայաստանի Հանրապետության օրենքի 4-րդ հոդվածի պահանջների՝ ՓՄՁ-ի սուբյեկտներին աջակցության տարեկան ծրագրերի ֆինանսավորումը կատարվում է Հայաստանի Հանրապետության պետական բյուջեից՝ առանձին տողով: Այն կարող է իրականացվել (համալրվել) նաև օրենքով չարգելված այլ ֆինանսական միջոցների հաշվին:

38. Ծրագրի իրականացման համար նախատեսվում է Հայաստանի Հանրապետության 2020 թվականի պետական բյուջեից հատկացնել 183,120.0 հազ ՀՀ դրամ:

Ժ Ա Մ Ա Ն Ա Կ Ա Ց ՈՒ Յ Ց
«ՓՄՁ-Ի ՍՈՒԲՅԵԿՏՆԵՐԻՆ ԱԶԱԿՑՈՒԹՅԱՆ ԾՐԱԳՐԵՐԻ ՀԱՄԱԿԱՐԳՈՒՄ ԵՎ ԿԱՌԱՎԱՐՈՒՄ»
2020 ԹՎԱԿԱՆԻ ԾՐԱԳՐԻ ԻՐԱԿԱՆԱՑՄԱՆ ՄԻՋՈՑԱՌՈՒՄՆԵՐԻ

NN ը/կ	Միջոցառումը	Ակնկալվող արդյունքը	Կատարողը	Կատարման ժամկետը	Ֆինանսավորման աղբյուրը
1	2	3	4	5	6
1.	ՓՄՁ-ի սուբյեկտներին գործարար ուսուցողական աջակցություն (կարողությունների զարգացում)	2020 թվականին Հայաստանի Հանրապետության բոլոր մարզերում և Երևան քաղաքում գործարար ուսուցողական դասընթացներին կմասնակցեն առնվազն 500 սկսնակ և գործող ՓՄՁ սուբյեկտներ:	ՀՀ Էկոնոմիկայի նախարարություն, Մրցույթում հաղթած կազմակերպություն	2020 թ. ընթացքում	ՀՀ պետական բյուջե և ՀՀ օրենքով չարգելված այլ աղբյուրներ
2.	ՓՄՁ-ի սուբյեկտներին գործարար տեղեկատվական, խորհրդատվական և տեխնիկական աջակցություն	2020 թվականին գործարար տեղեկատվական, խորհրդատվական և տեխնիկական աջակցության շրջանակներում սկսնակ և գործող ՓՄՁ սուբյեկտի կտրամադրվի 7000 - 8000 բանավոր խորհրդատվություն	ՀՀ Էկոնոմիկայի նախարարություն, Մրցույթում հաղթած կազմակերպություն	2020 թ. ընթացքում	ՀՀ պետական բյուջե և ՀՀ օրենքով չարգելված այլ աղբյուրներ
3.	ՓՄՁ-ի սուբյեկտներին ֆինանսական և ներդրումային աջակցություն	2020 թվականին գործող ՓՄՁ-ի սուբյեկտներին և սկսնակ գործարարներին ֆինանսական աջակցության (վարկային երաշխավորությունների տրամադրման) և գործարար նախաձեռնություններին աջակցության շրջանակներում ֆինանսական աջակցություն կցուցաբերվի 200 գործող և սկսնակ ՓՄՁ-ի սուբյեկտի	ՀՀ Էկոնոմիկայի նախարարություն, Մրցույթում հաղթած կազմակերպություն	2020 թ. ընթացքում	ՀՀ պետական բյուջե և ՀՀ օրենքով չարգելված այլ աղբյուրներ

4.	Տեղական տնտեսական զարգացում և ոլորտային աջակցություն	2020 թվականի ընթացքում կիրականացվեն՝ <ul style="list-style-type: none"> ➤ Տարածաշրջանային և համայնքային տնտեսական զարգացման ծրագրեր, ➤ օրինակելի գործարար մոդելների ստեղծում և ներդրում, ➤ տեխնոլոգիական ձեռնարկ-ուղեցույցերի հրատարակում, ➤ տեխնոլոգիական դրամաշնորհների տրամադրում, 	ՀՀ էկոնոմիկայի նախարարություն, Մրցույթում հաղթած կազմակերպություն	2020 թ. ընթացքում	ՀՀ պետական բյուջե և ՀՀ օրենքով չարգելված այլ աղբյուրներ
5.	Տեղական արտադրանքի արտահանման աջակցություն և ՓՄՁ-ի սուբյեկտների միջազգային համագործակցության ընդլայնման ապահովում	2020 թվականին համագործակցելով տեղական և միջազգային կազմակերպությունների հետ՝ կտեղայնացվի տվյալ ուղղությամբ գոյություն ունեցող լավագույն միջազգային փորձը: Արդյունավետ գործիքներ կկիրառվեն արտահանող կամ արտահանման ներուժ ունեցող ՓՄՁ սուբյեկտներին համակողմանի տեխնիկական, տեղեկատվական և խորհրդատվական աջակցություն ցուցաբերելու նպատակով:	ՀՀ էկոնոմիկայի նախարարություն, Մրցույթում հաղթած կազմակերպություն	2020 թ. ընթացքում	ՀՀ պետական բյուջե և ՀՀ օրենքով չարգելված այլ աղբյուրներ
6.	Միջազգային և օտարերկրյա դոնոր կազմակերպությունների հետ ՓՄՁ-ի զարգացման համատեղ (համաֆինանսավորման սկզբունքով) ծրագրերի մշակում և իրականացում	2020 թվականի ընթացքում աշխատանքներ կիրականացվեն Հայաստանում ՓՄՁ-ի զարգացման ուղղված համապատասխան ծրագրեր իրականացնող միջազգային և օտարերկրյա կազմակերպությունների (ծրագրերի) հետ համագործակցության ընդլայնման, ինչպես նաև նոր ծրագրային առաջարկների մշակման և իրականացման ուղղությամբ:	ՀՀ էկոնոմիկայի նախարարություն, Մրցույթում հաղթած կազմակերպություն	2020 թ. ընթացքում	ՀՀ պետական բյուջե և ՀՀ օրենքով չարգելված այլ աղբյուրներ